
OFFERYNNAU STATUDOL CYMRU

2013 Rhif 821 (Cy. 97)

**ANIFEILIAID, CYMRU
IECHYD ANIFEILIAID**

Rheoliadau Adnabod Gwartheg (Cymru) (Diwygio) 2013

<i>Gwnaed</i> - - - -	<i>9 Ebrill 2013</i>
<i>Gosodwyd gerbron Cynulliad Cenedlaethol Cymru</i> - -	<i>10 Ebrill 2013</i>
<i>Yn dod i rym</i> - -	<i>1 Mai 2013</i>

Mae Gweinidogion Cymru wedi eu dynodi at ddibenion adran 2(2) o Ddeddf y Cymunedau Ewropeaidd 1972(1) o ran polisi amaethyddol cyffredin yr Undeb Ewropeaidd(2) ac o ran mesurau yn y meysydd milfeddygol a ffotoiechydol ar gyfer amddiffyn iechyd y cyhoedd(3).

Mae Gweinidogion Cymru yn gwneud y Rheoliadau hyn drwy arfer y pwerau a roddwyd gan adran 2(2) o Ddeddf y Cymunedau Ewropeaidd 1972.

Enwi, cymhwyso a chychwyn

1. Enw'r Rheoliadau hyn yw Rheoliadau Adnabod Gwartheg (Cymru) (Diwygio) 2013; maent yn gymwys o ran Cymru ac yn dod i rym ar 1 Mai 2013.

Diwygio Rheoliadau Adnabod Gwartheg (Cymru) 2007

2. Mae Rheoliadau Adnabod Gwartheg (Cymru) 2007(4) wedi eu diwygio yn unol â rheoliadau 3 i 8.

3. Yn rheoliad 2 (dehongli), ym mharagraff (1) yn y man priodol yn nhrefn yr wyddor mewnosoder—

“ystyr “Rheoliad y Comisiwn (EC) Rhif 494/98” (“*Commission Regulation (EC) No 494/98*”) yw Rheoliad y Comisiwn (EC) Rhif 494/98 sy'n gosod rheolau manwl ar gyfer gweithredu Rheoliad y Cyngor (EC) Rhif 820/97 o ran cymhwyso y lefel isaf o sancsiynau gweinyddol yn fframwaith y system ar gyfer adnabod a chofrestru anifeiliaid buchol(5);”.

(1) 1972 p. 68. Diwygiwyd adran 2(2) gan adran 27(1)(a) o Ddeddf Diwygio Deddfwriaethol a Rheoleiddiol 2006/2006 (p. 51) ac adran 3(3) o Ddeddf yr Undeb Ewropeaidd (Diwygio) 2008 (p. 7) a Rhan 1 o'r Atodlen iddi.
(2) O.S. 2010/2690.
(3) O.S. 2008/1792.
(4) O.S. 2007/842 (Cy.74) a ddiwygiwyd gan O.S. 2007/3004 (Cy.260).
(5) OJ Rhif L 60, 28.2.1998, t.78, a ddiwygiwyd gan Rheoliad y Comisiwn (EU) Rhif 1053/2010 (OJ Rhif L 303, 19.11.2010, t.1).

4. Yn rheoliad 10 (pwerau arolygwyr), yn lle paragraff (1)(c) rhodder—
“(c) Rheoliad y Comisiwn (EC) Rhif 494/98;”.
5. Yn rheoliad 12 (cigydda anifeiliaid heb eu marcio), hepgorer “awdurdod milfeddygol a'r”.

Atodlen 2 (cofrestru gwartheg)

6. Ym mharagraff 2(3) o Atodlen 2, ar ôl paragraff (a) mewnosoder—
“(aa) drwy ddefnyddio gwasanaeth ffôn awtomataidd Gweinidogion Cymru;”.

Atodlen 3 (pasbortau gwartheg)

7. Ym mharagraff 11 o Atodlen 3, ar ôl is-baragraff (2) mewnosoder—
“(2A) Ond nid yw is-baragraff (2) yn gymwys i feddiannydd lladd-dy.”

Atodlen 4 (hysbysiad o symud neu farwolaeth)

8. Yn Atodlen 4—
 - (a) ym mharagraff 1(1), ar ôl paragraff (a) mewnosoder—
“(aa) drwy ddefnyddio gwasanaeth ffôn awtomataidd Gweinidogion Cymru;”; a
 - (b) ym mharagraff 2—
 - (i) yn lle is-baragraffau (1) i (3) rhodder—
 - “(1) Pan gigyddir anifail mewn lladd-dy, rhaid i feddiannydd y lladd-dy hysbysu Gweinidogion Cymru am y farwolaeth o fewn saith niwrnod—
 - (a) drwy ddefnyddio gwefan ryngweithiol Gweinidogion Cymru;
 - (b) drwy ddefnyddio gwasanaeth ffôn awtomataidd Gweinidogion Cymru;
 - (c) drwy ddefnyddio meddalwedd a gymeradwywyd gan Weinidogion Cymru; neu
 - (ch) drwy gwblhau'r manylion am y farwolaeth ym mhasbort yr anifail a'i ddychwelyd i Weinidogion Cymru,a rhaid iddo ddychwelyd pasbort yr anifail i Weinidogion Cymru o fewn saith niwrnod.
 - (2) Os cigyddir anifail y tu allan i ladd-dy ond ei fod yn cael ei anfon i ladd-dy er mwyn ei drin, rhaid i'r ceidwad lenwi'r manylion am y farwolaeth yn y pasbort a'i anfon gyda'r anifail i'r lladd-dy, a rhaid i feddiannydd y lladd-dy hysbysu'r farwolaeth drwy ddychwelyd y pasbort i Weinidogion Cymru o fewn saith niwrnod ar ôl marwolaeth yr anifail.
 - (3) Yn unrhyw achos arall, pan fydd anifail yn marw neu'n cael ei ladd rhaid i'r ceidwad hysbysu Gweinidogion Cymru am y farwolaeth o fewn saith niwrnod—
 - (a) drwy ddefnyddio gwefan ryngweithiol Gweinidogion Cymru;
 - (b) drwy ddefnyddio gwasanaeth ffôn awtomataidd Gweinidogion Cymru;
 - (c) drwy ddefnyddio meddalwedd a gymeradwywyd gan Weinidogion Cymru; neu
 - (ch) drwy gwblhau'r manylion am y farwolaeth ym mhasbort yr anifail a'i ddychwelyd i Weinidogion Cymru,a rhaid iddo ddychwelyd pasbort yr anifail i Weinidogion Cymru o fewn saith niwrnod.

(3A) Ond pan fo arolygydd wedi cymryd ac wedi cadw pasbort anifail o dan reoliad 10(3)(ch), nid yw gofyniad o dan y paragraff hwn i ddychwelyd y pasbort i Weinidogion Cymru yn gymwys cyhyd ag y mae'r pasbort yn cael ei gadw yn y fath fodd.”, a

(ii) hepgorer is-baragraff (5).

9 Ebrill 2013

Alun Davies
Y Gweinidog Cyfoeth Naturiol a Bwyd, un o
Weinidogion Cymru

Statws This is the original version (as it was originally made). Dim ond ar ei ffurf wreiddiol y mae'r eitem hon o ddeddfwriaeth ar gael ar hyn o bryd.

EXPLANATORY NOTE

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn diwygio Rheoliadau Adnabod Gwartheg (Cymru) 2007 (O.S. [2007/842](#)) (Cy.74).

Mae rheoliadau 3 a 4 yn diweddarau'r cyfeiriadau at ddeddfwriaeth yr UE. Mae rheoliad 5 yn egluro swyddogaeth yr awdurdod cymwys mewn perthynas ag anifeiliaid sydd heb eu hadnabod.

Mae rheoliad 6 yn gwneud darpariaeth i ychwanegu system ffôn awtomataidd newydd at y rhestr o ddulliau y caiff ceidwaid eu defnyddio i gofrestru anifeiliaid gyda Gweinidogion Cymru.

Mae rheoliad 7 yn gwneud darpariaeth i gael gwared ar yr angen i feddianwyr lladd-dai nodi manylion penodol ym mhasbortau'r anifeiliaid y maent wedi eu cigydda.

Mae rheoliad 8 yn gwneud darpariaeth i ganiatáu i geidwaid adrodd ar symudiadau anifeiliaid drwy ddefnyddio'r system ffôn awtomataidd newydd fel dull o hysbysu a hefyd i adrodd am farwolaethau anifeiliaid drwy ddefnyddio dulliau electronig yn ogystal ag ar bapur, ac eithrio yn achos anifeiliaid a gigyddir y tu allan i ladd-dy ac a anfonir i ladd-dy er mwyn eu trin. Rhaid dychwelyd pasbort anifail i Weinidogion Cymru o fewn saith niwrnod i'r farwolaeth onid yw arolygydd wedi ei gadw.

Ystyriwyd Cod Ymarfer Gweinidogion Cymru ar wneud Asesiadau Effaith Rheoleiddiol mewn perthynas â'r Rheoliadau hyn. O ganlyniad, ystyriwyd nad oedd yn angenrheidiol gwneud asesiad effaith rheoleiddiol o'r costau a'r buddiannau sy'n debygol o ddeillio o gydymffurfio â'r Rheoliadau hyn.